

禮

經

釋

例

禮經釋例卷六目錄

賓客之例

凡賓至則使人郊勞

凡郊勞畢皆致館

凡賓至廟門皆設几筵

凡賓主人相見皆行受摯之禮

凡賓主人受摯畢禮盛者則行享禮

凡賓主人行禮畢主人待賓用醴則謂之醴不用醴則

謂之饋

凡爲人使者正禮畢則行私覲或私面之禮

凡賓主人禮畢皆還其摯

凡庭實之皮皆攝之內文入設于庭賓致命于堂則張皮于庭主人受幣則受皮者受之

凡庭實之馬右牽之入設于庭賓投幣于堂則受馬者受馬于庭主人授其屬幣則馬出

凡聘覲禮畢主人皆親勞賓

凡禮畢勞賓後則使人致禮于賓

凡會同之禮四傳擯皆如覲禮

凡會同巡守之禮皆祀方明

凡天子於諸侯則傳擯諸侯於聘賓則旅擯

凡相大禮皆上擯之事

凡諸侯使人于諸侯謂之聘使人于大夫謂之問小聘亦謂之問

凡聘問覲皆于廟會同于壇士相見于寢

共十八例

附覲義一篇

禮經釋例

卷六 賓客之例 附親義一篇

卷七

射例

附月室射射五物考

射禮致獲印古算法

禮經釋例卷六

賓客之例

凡賓至則使人郊勞

廷堪案聘禮賓至于近郊張旆君使下大夫請行反君使卿朝服用束帛勞上介出請入告賓禮辭迎于舍門之外再拜賓揖先入受于舍門內勞者奉幣入

東面致命

疏云賓在館如主人故勞者東面向之也

賓北面聽命還少退

再拜稽首受幣勞者出授老幣

注老賓之臣

此使者勞賓

也又云出迎勞者

此聘賓出也

勞者禮辭賓揖先入勞者

從之乘皮設賓用束錦儻勞者勞者再拜稽首受賓

再拜稽首送幣勞者揖皮出乃退賓送再拜此聘賓

儻使者也

以上皆君使
贈勞賓之禮

又云夫人使下大夫勞以二

竹簋方

釋文簋
或作篚

元被纁裏有益其實棗蒸栗擇兼執

之以進賓受棗大夫二手授栗賓之受如初禮儻之

如初

以上夫人使下
大夫勞賓之禮

此皆聘禮之郊勞也用束帛夫

人用棗栗覲禮至于郊王使人皮弁用璧勞侯氏亦

皮弁迎于帷門之外再拜使者不答拜遂執玉三揖

至于階使者不讓先升侯氏升聽命降再拜稽首遂

升受玉使者左還而立侯氏還璧使者受侯氏降再

拜稽首。使者乃出。此王使人勞侯氏也。又云侯氏乃

止使者，使者乃入。侯氏與之讓升。

前使者郊勞是奉王命故不讓先升

此郊勞禮畢侯使者故讓升也

侯氏先升，授几。侯氏拜送几，使者設

几答拜。侯氏用束帛乘馬，僮使者，使者再拜受。侯氏

再拜送幣，使者降，以左驂出。侯氏送於門外，再拜。侯

氏遂從之。此侯氏僮使者也。此則覲禮之郊勞也。用

璧。至於聘禮，郊勞用朝服，覲禮郊勞用皮弁。聘，賓僮

勞者用束錦，侯氏僮勞者用束帛，乘馬皆隆殺之義

也。亦有不郊勞者，聘禮聘遭喪不郊勞。注子未君也。

又小聘曰問，不郊勞。注貶於聘，所以爲小也。皆禮之

殺也又聘禮郊勞畢下大夫勞者遂以賓入謂入朝也致館方覲禮郊勞畢侯氏遂從之注從之者遂隨使者以至朝其儀竝同唯聘禮聘賓不拜送覲禮侯氏拜送爲異

又案聘禮郊勞受于舍門內注不受于堂此主於侯伯之臣也公之臣受勞於堂疏云案司儀請公之臣相爲國客及大夫郊勞三辭拜辱三讓登聽命是公之臣受勞於堂之事然則鄭氏此注蓋據周禮而推之非禮經本義矣

凡郊勞畢皆致館

依神也。賓至廟門，司宮乃于依前設之神尊，不豫事也。席西上，聘享畢，請禮賓，宰夫徹几，改筵。覲禮，但云天子設斧，依於戶牖之間，左右几，別無几筵。既設之，文聘禮疏云：覲禮不云几筵，文不具也。是賓至廟門，皆設几筵也。士昏禮納采，主人筵于戶西，西上，右几。使者元端至，事畢，請醴賓，主人徹几，改筵。昏禮使者士之屬，若羣吏使往來者，猶諸侯之於聘賓，故其儀亦略如聘禮也。又士昏禮親迎，壻至于門外。此是大門外主人筵于戶西，西上，右几。又云：主人揖入，賓執鴈從。至于廟門，揖入，壻至女家，則爲賓，女父爲主人，故亦

設几筵也。亦有不几筵者。聘禮記唯大聘有几筵。注謂受聘享時也。小聘輕。雖受于廟。不爲神位。又聘禮聘遭喪不筵。几注致命不于廟。就尸柩於殮宮。又不神之。又云小聘曰問。主人不筵。几注記貶於聘。所以爲小也。又聘禮賓問卿。卿受于祖廟及廟門。大夫揖入。擯者請命。注不几筵。辟君也。敖氏繼公曰不几筵者。君使尊不敢設神位以臨之。不几筵之義有二。禮太重者不設此類是也。禮差輕者亦不設小聘之禮是也。敖說誤也。問輕於聘。問卿之禮又輕於聘。君故不几筵。非重也。小聘曰問。且不几筵。况問卿乎。注云

辟君其義長矣又士冠禮賓至廟門不云几筵此禮主於冠故異於賓客之禮也

凡賓主人相見皆行受摯之禮

廷堪案士相見禮主人揖入門右賓奉贄與摯同入門

左主人再拜受賓再拜送贄出大夫相見如士相見之禮此士大夫相見之受摯也聘禮擯者納賓賓入門左介皆入門左北面西上三揖至于階三讓公升二等賓升西楹西東面擯者退中庭賓致命公左還北鄉擯者進公當楣再拜賓三退負序公側襲受玉于中堂與東楹之間擯者退負東塾而立賓降介逆

出賓出公側授宰玉此主國之君受聘賓摯也又問

卿庭實設四皮

受摯卽設庭實貶於聘也

賓奉束帛入三揖皆行

至于階讓賓升一等大夫從升堂北面聽命賓東面

致命大夫降階西再拜稽首賓辭升成拜受幣堂中

西北面賓降出大夫降授老幣此主國之卿受賓摯

也又上介朝服三介問下大夫下大夫如卿受幣之

禮此主國之下大夫受介摯也

賓與介皆代其君行禮者

皆賓授

摯而主人受之士相見禮士見於大夫賓入奠摯再

拜主人答壹拜賓出此大夫受士摯也又始見于君

士大夫則奠摯再拜稽首君答壹拜此君受臣摯也

親禮侯氏入門右坐奠圭再拜稽首

注入門右執臣道不敢由賓客

位也卑者見尊奠摯而不受

摯者謁侯氏坐取圭升致命王受之

玉侯氏降階東北面再拜稽首摯者延之曰升升成拜乃出此天子受諸侯摯也其摯皆奠而不授又土昏禮納采用鴈使者至于廟門揖入三揖至于階三讓主人以賓升西面賓升西階當阿東面致命主人阼階上北面再拜授于楹間南面賓降出主人降授老鴈問名執鴈如初禮納吉用鴈如納采禮納徵元纁束帛儷皮如納吉禮請期用鴈如納徵禮此主人受使者摯略如聘禮及問卿之禮又親迎主人升西

面賓升北面奠鴈再拜稽首降出此壻見女父略如
士見於大夫之禮士昏記若不親迎三月壻見壻入
門東面奠壻再拜出壻者以壻出請受壻禮辭許受
壻入主人再拜受壻再拜送出此不親迎壻見女父
先奠壻如士見於大夫之禮後壻者辭乃如士相見
之禮也他若郊勞致館歸饗餼諸禮皆有玉帛以將
之亦受壻之屬也

又案士冠禮冠畢易服奠壻見於君遂以壻見於鄉
大夫鄉先生此卽士相見禮見於君見於大夫之禮
也鄉大夫敖氏繼公曰鄉之異爵者或曰卽主治一

鄉者此說非也。鄉當作卿。見君後乃見卿大夫耳。疏云卿大夫不言士。其實亦當有士。則賈所見經文正是卿字。禮記冠義亦當作見於卿大夫。敖氏蓋未之深考也。說見盧氏文弼鍾山札記

凡賓主人受摯畢。禮盛者則行享禮。

廷堪案聘禮公受玉畢。

此玉是璋圭

揚降立擯者出請賓

祿奉束帛加璧享。擯者入告。出許庭實。皮則攝之。毛在內。內攝之入設也。賓入門左揖讓如初。升致命。張皮公再拜受幣。士受皮者。自後右客。賓出當之坐。攝之公側授宰幣。皮如入右首而東。此聘禮受摯畢行

享也。又云聘于夫人用璋，享用琮。如初禮，此言聘享。

夫人之禮也。覲禮受玉畢。

此玉是命圭。

四享。

注四當爲三。

皆束。

帛加璧庭實，唯國所有。奉束帛匹馬卓上，九馬隨之。

中庭西上奠幣，再拜稽首。擯者曰：「子一人將受之。」侯

氏升致命，王撫玉。侯氏降自西階，東面授宰幣。西階

前再拜稽首，以馬出授人。九馬隨之事畢，此覲禮受

摯畢行享也。皆禮之盛者也。諸侯使人于諸侯，但一

享。諸侯見于天子，則三享。覲禮又盛于聘禮也。至於

問卿之禮，則摯與庭實同受。士昏禮納徵亦然。士相

見之禮，但受摯而已。無庭實，皆禮之殺者也。又聘禮

若有言則以束帛如享禮。注記曰有故則束帛加書以將命。春秋臧孫辰告糴于齊公子遂如楚乞師。晉侯使韓穿來言汶陽之田皆是也。無庭實也是此禮。但無庭實餘皆如享禮矣。

又案覲禮庭實唯國所有。注初享或用馬或用虎豹之皮。其次享三牲魚腊籩豆之實。龜也。金也。丹漆絲續竹箭也。其餘無常貨。此地物非一國所能有。唯所有分爲三享。皆以璧帛致之。此據禮器文而言其說非也。聘禮記凡庭實皮馬相間可也。注間猶代也。土物有宜。君子不以所無爲禮。言有皮則以皮。有馬則

以馬卽覲禮唯國所有之義觀下文但云匹馬卓上
九馬隨之不云他物則三享皆皮馬無他物可知聘
禮享庭實云皮私覲庭實云馬覲禮享庭實亦云馬
皆互見也至于禮器云大饗其王事與又云其出也
肆夏而送之蓋指饗食燕之饗禮而言故有三牲魚
腊籩豆之屬非謂覲禮之享也又鄭氏禮器注以大
饗爲祫祭先王亦非郊特牲云鼎俎奇而籩豆偶陰
陽之義也籩豆之實水土之品也又云賓入大門而
奏肆夏示易以敬也卒爵而樂闋孔子屢歎之奠酬
而工升歌發德也歌者在上匏竹在下貴人聲也又

云旅幣無方所以別土地之宜而節遠邇之期也龜
爲前列先知也以鐘次之以和居參之也虎豹之皮
示服猛也束帛加璧往德也皆指饗禮而言與禮器
正相合孔氏正義謂賓入大門以下爲論燕饗之禮
謂旅幣無方以下爲論朝聘庭實之物蓋依違鄭注
而爲此說不知禮經聘覲之享庭實唯有皮馬也又
禮器云大饗腥三獻燭一獻孰鄭氏以上文云郊血
故以大饗爲祫祭
疑亦指賓客之饗卽左傳宣十六年享有體薦是也
饗禮篇亾無可考竊附鄙見於此

凡賓主人行禮畢主人待賓用醴則謂之禮不用醴則

謂之儻。

廷堪案賓主人行禮既畢必有禮賓及儻使者之禮。

所以申主人之敬也。士昏禮納采問名禮畢，擯者出。

請醴賓。

注此醴亦當爲禮。

賓禮辭許，主人徹几，改筵東上，側。

尊，甒醴于房中。主人迎賓于廟門外，揖讓如初。

如授鴈時。

升，主人北面再拜，賓西階上北面答拜。主人拂几授。

校，拜送賓以几，辟北面設于坐，左之西階上答拜。贊。

者酌醴加角，柶而葉，出于房。主人受醴，面枋筵前西。

北面賓拜受醴，復位。主人阼階上拜送，贊者薦脯醢。

賓卽筵坐，左執觶祭脯醢以柶，祭醴三，西階上北面。

坐啐醴建柶與坐奠觶遂拜主人答拜賓卽筵奠于

薦左降筵北面坐取脯主人辭賓降授人脯出此女

父禮賓也聘禮聘享禮畢賓奉束錦以請覲擯者入

告出辭

注客有大禮未有以待之

請禮賓賓禮辭聽命擯者入告

宰夫徹几改筵公出迎賓以入揖讓如初

如聘享時

公升

側受几于序端宰夫內拂几三奉兩端以進公東南

鄉外拂几三卒振袂中攝之進西鄉擯者告賓進訝

受几于筵前東面俟公壹拜送賓以几辟北面設几

不降階上答再拜稽首宰夫實觶以醴加柶于觶面

枋公側受醴賓不降壹拜進筵前受醴復位公拜送

醴宰夫薦籩豆脯醢賓升筵擯者退負東塾賓祭脯
醢以柶祭醴三庭實設降筵北面以柶兼諸觶尙擯
坐啐醴公用束帛建柶北面奠于薦東擯者進相幣
賓降辭幣公降一等辭栗階升聽命降拜公辭升再
拜稽首受幣當東楹北面退東面俟公壹拜賓降也
公再拜賓執左馬以出上介受賓幣從者訝受馬此
主國之君禮賓也皆用醴又聘禮郊勞畢聘賓出迎
勞者注欲僨之勞者禮辭賓揖先入勞者從之乘皮設賓
用束錦僨勞者勞者再拜稽首受賓再拜稽首送幣
勞者揖皮出又夫人使下大夫勞僨之如初又歸饗

餼畢出迎大夫

注賓出迎欲饋之

大夫禮辭許入揖讓如初

如歸饗饋時

賓升一等大夫從升堂庭實設馬乘賓降堂

受老束錦大夫止賓奉幣西面大夫東面賓致幣大夫對北面當楣再拜稽首受幣于楹間南面退東面俟賓再拜稽首送幣大夫降執左馬以出又下大夫歸上介饗餼饋之兩馬束錦又夫人使下大夫歸禮畢賓饋之乘馬束錦上介饋之兩馬束錦此聘賓及上介饋主國之使者也覲禮郊勞畢侯氏乃止使者使者乃入侯氏與之讓升侯氏先升授几侯氏拜送几使者設几答拜侯氏周束帛乘馬饋使者使者再

拜受侯氏再拜送幣使者降以左驂出又天子賜舍

畢儻之束帛乘馬又賜侯氏車服畢儻使者諸公賜

服者束帛四馬

馬即乘

儻大史亦如之此皆侯氏儻天

子之使者也皆不用醴經例之分明如此至於禮廢

或用束帛庭實或不用束帛庭實儻使者或用束帛

或用束帛庭實或用皮或用乘馬或用兩馬或用几

或不用几蓋禮有大小故儀有隆殺也又聘禮問卿

無儻注不儻辟君也使大夫致食饗無儻注以己本

宜往又贈送無儻敖氏繼公曰無儻以其答己之覲

故也歸士介饗餼無儻敖氏繼公曰無儻者賤也此

皆無儻之義也。問卿略如聘君之禮，唯不授玉致庭實，有束帛無璧及不儻爲殺耳。

又案周禮秋官司儀云：賓亦如之。後鄭注：賓當爲儻，謂以鬱鬯禮賓也。上於下曰禮，敵者曰儻。鄭氏蓋以上文凡諸公相爲賓，故云敵者曰儻。與禮例未合。賈氏引之以釋禮經非也。鄭注又引禮器曰：諸侯相朝，灌用鬱鬯，無籩豆之薦，謂此朝禮畢儻賓也。考禮器此文若兩君相見，灌用鬱鬯不用醴也。又大行人上公王禮再裸而酢。侯伯壹裸而酢，子男壹裸不酢。乃天子禮賓之事。後鄭注亦以爲用鬱鬯然覲禮覲享畢，經不云禮賓。

注亦不引大行人以釋之蓋以其難強同歟
凡爲人使者正禮畢則行私覲或私面之禮

廷堪案聘禮享畢賓請覲擯者辭請禮賓禮賓畢賓
覲奉束錦總乘馬二人贊入門右北面奠幣再拜稽
首擯者辭賓出擯者坐取幣出有司二人牽馬以從
出門西面于東塾南此賓先請以臣禮見而擯者辭
之也又云擯者請受賓禮辭聽命牽馬右之入設此
賓者請以客禮受而賓許之也又云賓奉幣入門左
介皆入門左西上公揖讓如初升公北面再拜賓三
退反還負序振幣進授當東楹北面止受馬者自前

還牽者後適其右受牽馬者自前西乃出賓降階東拜送君辭栗階升公西鄉賓階上再拜稽首公少退賓降出公側授宰幣馬出公降立此言賓覲也前聘享是代君行禮故不拜此覲是以私禮見故再拜稽首也又云擯者出請上介奉束錦士介四人皆奉玉錦束請覲擯者入告出許上介奉幣儷皮二人贊皆入門右東上奠幣皆再拜稽首擯者辭介逆出擯者執上幣士執衆幣有司二人舉皮從其幣出請受委皮南面執幣者西面北上擯者請受介禮辭聽命皆進訝受其幣此亦先請以臣禮見而後以客禮受也

又云上介奉幣皮先入門左奠皮公再拜介振幣自皮西進北面授幣退復位再拜稽首送幣介出宰自公左受幣有司二人坐舉皮以東此言上介覲也受幣于庭不升堂禮殺也又云擯者又納士介士介入門右奠幣再拜稽首擯者辭介逆出擯者執上幣以出禮請受賓固辭此則終不敢以客禮見也又云公答再拜擯者出立于門中以相拜士介皆辟士三人東上坐取幣立擯者進宰夫受幣于中庭以東執幣者序從之此言衆介覲也以臣禮見公不親受幣宰夫受之於中庭禮又殺也以上皆聘君後私覲之禮

也。又聘禮問卿畢，擯者出請事。賓面如覲幣，賓奉幣。

庭實從入門右，大夫辭，賓遂左。

注見私事也。雖敵賓猶謙入門右爲若降。

然庭實設，揖讓如初。大夫升一等，賓從之。大夫西面。

賓稱面，大夫對北面當楣再拜，受幣于楹間，南面退。

西面立。賓當楣再拜，送幣降出。大夫降授老幣，此聘。

賓面卿猶聘，享後之有覲也。又云：擯者出請事，上介。

特而幣如覲。介奉幣，皮二人贊入門右，奠幣再拜。大。

夫辭擯者反幣。庭實設，介奉幣入。大夫揖讓如初，介。

升。大夫再拜受介降拜，大夫降辭，介升再拜送幣。此。

上介面卿猶上介覲主君也。凡異者皆禮殺。又云：擯。

者出請衆介面如覲幣入門右奠幣皆再拜大夫辭
介逆出擯者執上幣出禮請受賓辭大夫答再拜擯
者執上幣立于門中以相拜士介皆辟老受擯者幣
于中庭士三人坐取羣幣以從之此衆介面卿猶衆
介覲主君也再拜不稽首辟君也又云上介問下大
夫其面如賓面于卿之禮以上皆問卿大夫後私面
之禮也又聘禮記賓卽館訝將公命又見之以其擊

注復以私禮見者訝將舍於賓館之外宜相親也

亦私面之類也

父案覲禮享後無覲者諸侯親見于天子享時已申
其敬無緣復有私覲也聘禮享後有覲者享是聘賓

致其君之命。至覲時聘。賓始得自申其敬。蓋聘賓代君行禮。故享後另有私覲。與覲不同也。郊特牲云。朝覲大夫之私覲。非禮也。此言朝覲之禮。大夫從君而行。無私覲也。又云。大夫執圭而使。所以申信也。鄭注以君命聘。則有私見。此言大夫奉使出聘。則有私覲也。又云。不敢私覲。所以致敬也。孔疏覆明從君而行。不敢行私覲。所以致敬於已君也。此申言上文朝覲大夫私覲非禮之義。非謂大夫執圭而使。不敢私覲也。今以禮經證之。覲禮無私覲。聘禮有私覲。鄭孔之說甚明。悉與經合也。

凡賓主人禮畢皆還其摯

廷堪案士相見禮賓見主人畢主人復見之以其摯

固辭

賓奉摯入

此賓即前主人

主人再拜受

此主人即前賓

賓再拜

送摯出主人送于門外再拜大夫相見如士相見之

禮此士大夫相見還摯也又士見於大夫畢賓出使

摯者還其摯于門外

固辭許

賓再拜受此大夫還士摯

也又見于君畢若他邦之人則使摯者還其摯賓再

拜稽首受此君還他邦臣摯也聘禮君使卿皮弁還

玉于館賓皮弁襲迎于外門外不拜帥大夫以入大

夫升自西階鉤楹賓自碑內聽命升自西階自左南

面受圭退負右房而立大夫降中庭賓降自碑內東
面授上介于阼階東此還圭也又云上介出請賓迎
大夫還璋如初入此還璋也又云賓謁迎大夫賄用
束紘禮玉束帛乘皮皆如還玉禮大夫出賓送不拜
此報享也皆聘禮還摯也必還摯者禮尚往來輕財
而重禮也又聘禮賓行公使卿贈如覲幣受于舍門
外如受勞禮無儼使下大夫贈上介亦如之使士贈
衆介如其覲幣大夫親贈如其面幣無儼贈上介亦
如之使人贈衆介如其面幣公贈者報其覲也大夫
贈者報其面也聘禮記賓既將公事復見訝以其摯

注復報也皆還擊之類也。覲禮不云還玉，考覲禮郊勞用璧，侯氏還璧，使者注受還玉重禮。夫郊勞且還璧，覲用命圭，自無不還之理。今覲禮存，春朝夏宗冬遇禮亡，或別見三時禮與聘禮同。卿雖無還擊之事，然還玉時大夫賄以束紘，方答聘君之束帛也。還玉，賓與大夫皆不拜。注不拜，示將去不純為主也。敖氏繼公曰：禮不主於已，故不拜。敖說長也。

又案聘禮授玉時，賓襲執圭，公側襲受玉。至還玉時，

賓皮弁襲。

敖氏繼公曰：大夫亦襲。

享時，公褻降立，賓褻奉束帛。

加璧至報享時，賓褻迎。

敖氏繼公曰：大夫於賓褻亦褻。

聘與還玉皆

饗享與報享皆禘禮盛者答之亦盛禮殺者答之亦殺也此而觀之禮之精意見矣

凡庭實之皮皆攝之內文入設于庭賓致命于堂則張皮于庭主人受幣則受皮者受之

廷堪案士昏記納徵執皮攝之內文兼執足左首隨入西上參分庭一在南賓致命釋外足見文主人受幣士受皮者自東出于後自左受遂坐攝皮逆退適東壁注攝猶辟也兼執足者左手執前兩足右手執後兩足左首象生曲禮曰執禽者左首賓致命主人受幣庭實所用爲節注云爲節者謂賓致命于堂之

時則執皮者張皮于庭主人受幣于堂之時則受皮者受皮于庭也聘禮行享庭實皮則攝之毛在內內攝之入設也賓入門左揖讓如初升致命張皮公再拜受幣士受皮者自後右客賓出當之坐攝之公側授宰幣皮如入右首而東注攝之者右手并執前足左手并執後足毛在內不欲文之豫見也內攝之者兩手相鄉也入設亦參分庭一在南張者釋外足見文也如入左在前皮右首者變于生也此經云致命張皮卽士昏記賓致命釋外足見文故注引之是其節同也又聘賓問鄉庭實設四皮問下大夫如卿受

幣之禮郊勞僨使者乘皮設其執皮受皮之節經皆
不詳蓋文不具也至於上介覲儷皮入門左奠皮公
再拜受于中庭不升堂有司二人坐舉皮以東其執
皮受皮之節殺于享禮也上介函卿經但云皮二人
贊則又殺可知也

又案士昏納徵聘禮行享執皮受皮其例皆同士昏
執皮云左首聘禮受皮云右首鄭君遂生異儀士昏
記注左手執前足右手執後足聘禮注右手執前足
左手執後足以爲左首右首之別又云左首象生右
首變于生其說非也蓋執皮考以左首受皮者則右

禮記卷之八 聘義 卷之八 聘義 卷之八 聘義
首也。士昏記執皮者左首而受皮者無文聘禮受皮者右首而執皮者無文其例互見也。鄭氏以士昏爲左首聘禮爲右首。敖氏據士昏記欲改聘禮爲左首皆失經之意。蔡氏德晉曰：凡獻者左首受者右首禮相變也。方之舊說爲長矣。

凡庭實之馬右牽之。入設于庭。賓授幣于堂。則受馬者受馬于庭。主人授其屬幣。則馬出。

廷堪案聘禮賓覲牽馬右之。入設注庭實先設客禮也。右之欲人居馬左。任右手便也。於是牽馬者四人。事得申也。曲禮曰：郊馬郊羊者右牽之。又賓升堂授

幣之時經云士受馬者自前還牽者後適其右受牽馬者自前西乃出注自由也適牽者之右而受之也受馬自前變於受皮又公側授宰幣之時經云馬出注廟中宜清此聘禮賓覲受馬之節也張氏爾岐曰此受馬亦視堂上受幣以爲節也覲禮侯氏享奉束帛匹馬卓上九馬隨之中庭西上奠幣再拜稽首注馬必十匹者不敢斥王之乘用成數敬也又云侯氏升致命王撫玉侯氏降自西階東面授宰幣西階前再拜稽首以馬出授人九馬隨之此覲禮三享受馬之節也敖氏繼公曰王臣不於內受馬者無以爲節

亦至尊之禮異也。凡他禮之庭實，其主人之士受之者，皆以堂上授受爲節。又聘禮面卿，賓奉幣，庭實從。注：庭實四馬，蓋賓問卿類正聘之享，故庭實用四皮。賓面卿類正聘之覲，故庭實用四馬。其授受之節，當亦如賓覲也。又禮賓庭實設賓，執左馬以出，歸饗餼。饋使者乘馬，使者降以左，驂出皆受者親執馬。其節又與賓覲異也。又聘禮夫人歸禮，賓饋使者乘馬。上介兩馬，覲禮賜舍，饋使者乘馬，賜車服，饋使者四馬。經皆不云授受之節，文不具也。至於庭實用馬，或兩

馬或乘馬猶之用皮或儷皮或四皮也

又案呂氏春秋慎大覽權勳篇晉獻公乃使荀息以
屈產之乘爲庭實而加以垂棘之璧以假道於虞而
伐虢是晉人聘虞享時束帛所加之璧爲垂棘之璧
庭實所設之馬爲屈產之乘

享禮庭實四馬

言其良也三傳

及孟子皆有此文而何休杜預范甯趙岐不知引享
禮以釋之疎矣左傳哀公七年邾茅夷鴻以束帛乘
韋自請救於吳乘韋者四皮亦庭實也聘禮記凡庭
實隨入左先皮馬相間可也賓之幣唯馬出其餘皆
東注間猶代也土物有宜君子不以所無爲禮畜獸

同類可以相代故晉國產馬庭實用馬邾國不產馬庭實用皮也若皮馬並產則享用皮覲用馬介覲又用皮如經所云亦相間之義也

凡聘覲禮畢主人皆親勞賓

廷堪案聘禮私覲後擯者出請賓告事畢擯者入告

公出送賓及大門內公問君

注蘧伯玉使人於孔子孔子問曰夫子何爲此

公問君之類也賓對公再拜公問大夫賓對此勞賓之前公

問君及大夫也又云公勞賓賓再拜稽首公答拜公

勞介介皆再拜稽首此聘畢主君勞聘賓也覲禮侯

氏三享後乃右肉袒于廟門之東乃入門右北面立

告聽事。擯者謁諸天子。天子辭於侯氏曰：伯父無事，歸寧乃邦。侯氏再拜稽首出，自屏南適門西，遂入門左，北面立。此勞賓之前。侯氏請罪也。又云：王勞之，再拜稽首。擯者延之曰：升，升成拜，降出。此覲畢。天子勞侯氏也。是聘覲禮畢，主人皆親勞賓也。又聘禮賓請有事於大夫。注：請問卿也。公禮辭許賓，卽館卿大夫勞賓。賓不見，大夫奠鴈再拜，上介受勞，上介亦如之。此則問卿之前。卿大夫往賓館勞賓，猶正聘之郊勞。非禮畢勞賓也。郊勞使人，此親勞之下君也。

凡禮畢勞賓後，則使人致禮于賓。

廷堪案聘禮賓卽館

卿大夫勞
賓介訖

君使卿韋弁歸饔餼

五年上介請事賓朝服禮辭有司入陳

陳饔餼儀節
見飲食之例

賓皮弁迎大夫于外門外再拜大夫不答拜揖入及

廟門賓揖入大夫奉束帛入三揖皆行至于階讓大

夫先升一等賓從升堂北面聽命大夫東面致命賓

降階西再拜稽首拜餼亦如之大夫辭升成拜受幣

堂中西北面大夫降出賓降授老幣儻大夫乘馬束

錦

儻使者
見上

明日賓拜于朝拜饔與餼皆再拜稽首此

歸賓饔餼也又云上介饔餼三牢下大夫韋弁束

帛致之上介韋弁以受如賓禮儻之兩馬束錦此歸

上介饗餼也。又云士介四人皆餼。大牢宰夫朝服牽牛以致之。士介朝服北面再拜稽首受。無儻。此餼士介也。上介三牢禮殺也。士介有餼無饗禮又殺也。此皆聘後主君致禮于賓介也。覲禮覲畢。天子親勞侯氏後天

子賜侯氏以車服。迎于外門外再拜。路先設西上路。下四亞之。重賜無數。在車南。諸公奉篋服。加命書于其上。升自西階。東面。大史是右。侯氏升。西面立。大史述命。侯氏降。兩階之間北面再拜稽首。升成拜。大史加書于服上。侯氏受。使者出。侯氏送。再拜。儻。使者諸公賜服者束帛四馬。儻。大史亦如之。此覲後天子致

禮于侯氏也。歸饗餼與賜車服名物雖不同。而其爲致禮則一也。又聘禮問卿大夫畢。夕。夫人使下大夫韋弁歸禮。籩豆六醜。黍清皆兩。壺大夫以束帛致之。賓如受饗之禮。儻之乘馬束錦。上介四豆四籩。四壺受之。如賓禮。儻之兩馬束錦。明日賓拜禮於朝。此夫人歸禮于賓介。無牢。但有籩豆及壺禮殺也。又云大夫餼賓大牢。米八簋。賓迎再拜。老牽牛以致之。賓再拜稽首受。老退。賓再拜送上介亦如之。衆介皆少牢。米六簋。皆士牽羊以致之。此大夫餼賓介。無饗。如主君餼士介之禮。貶於君也。衆介用少牢。又殺於賓介。

也。饗餼皆有。則使者用束帛以致之。有餼無饗。則使者但牽牛羊以致之。亦禮例也。

凡會同之禮。四傳擴皆如覲禮。

廷堪案覲禮諸侯覲於天子。爲官方三百步。四門。壇十有二尋。深四尺。注四時朝覲受之於廟。此謂時會。殷同也。考周禮大宗伯時見曰會。鄭注時見者言無常期。諸侯有不順服者。王將有征討之事。則既朝覲。王爲壇於國外。合諸侯而命事焉。春秋傳曰有事而會。不協而盟是也。又殷見曰同。鄭注殷猶衆也。十二歲王如不巡守。則六服盡朝。朝禮既畢。王亦爲壇合。

諸侯以命政焉。所命之政如王巡守。殷見四方四時
分來終歲則徧。又大行人時會以發四方之禁。殷同
以施天下之政。鄭注司馬法曰時以禮會諸侯。施同
政。殷以禮宗諸侯。發同禁。卽此注所謂時會。殷同也。
覲禮又云上介皆奉其君之旂。置于宮。尙左。公侯伯
子男皆就其旂而立。注置于宮者。建之。豫爲其君見
王之位也。諸公中階之前。北面。東上。諸侯東階之東
西。面北上。諸伯西階之西。東面北上。諸子門東北面
東上。諸男門西北面東上。尙左者。建旂。公東上。侯先
伯伯先子。子先男。而位皆上東方也。諸侯入壙門。或

左或右各就其旂而立王降階南鄉見之三揖土揖庶姓時揖異姓天揖同姓見揖位乃定此會同之禮五等之君之位及天子揖之之儀也注皆約朝事儀明堂位及周禮司儀言之經又云四傳擴注王既揖五者升壇設擴升諸侯以會同之禮其奠瑞玉及享幣公拜於上等侯伯於中等子男於下等擴者每延之升堂致命王受玉撫玉降拜於下等及請事勞皆如覲禮是以記之覲云四傳擴者每一位畢擴者以告乃更陳列而升其次公也侯也伯也各一位子男俠門而俱東上亦一位也此皆約上文覲禮言之是

如會同之禮四傳攷皆如覲禮也注又云至庭乃設
擯則諸侯初入門王官之伯帥之耳此則約願命言
之非覲禮也上經云嗇夫承命告于天子又云侯氏
入門右是覲禮門外設擯也又注中公上等侯伯中
等子男下等亦約司儀言之蓋將合諸侯則令爲壇
三成本司儀文也

又案敖氏繼公以此禮爲大朝覲之禮又以五等之
位皆北面爲一列又以一朝三享爲四傳擯皆與注
異因經無明文故附存之竊謂五等之爵不應無差
等享時亦不應升拜注說不可易也

凡會同巡守之禮皆祀方明

廷堪案觀禮壇十有二尋深四尺加方明于其上方明者木也方四尺設六色東方青南方赤西方白北方黑上元下黃設六玉上圭下璧南方璋西方琥北方璜東方圭注方明者上下四方神明之象也上下四方之神者所謂明神也會同而盟明神監之則謂之天之司盟有象者猶宗廟之有主乎六色象其神六玉以禮之上宜以蒼璧下宜以黃琮而不以者則上下之神非天地之至貴者也設玉者刻其木而著之又四傳攷後經云天子乘龍載大旂象日月升龍

降龍出拜曰於東門之外反祀方明注此謂會同以
春者也又云禮日於南門外禮月與四瀆於北門外
禮山川邱陵於西門外注此謂會同以夏冬秋者也
又云祭天燔柴祭山邱陵升祭川沈祭地瘞注升沈
必就祭者也就祭則是謂王巡守及諸侯之盟神也
其盟揭其著明者燔柴升沈瘞祭禮終矣備矣考此
二節經注文多疑義未敢強解姑卽舊注大槩錄之
以俟知禮者如經先言四傳填後言反祀方明注引
朝事儀謂已祀方明乃以首同之禮見諸侯經言祭
天燔柴注引大宗伯謂是祭日經言祭地瘞注謂是

祭月皆顯與經違疑不能明也

又案漢書律歷志伊訓篇曰伊尹祀于先王誕資有
牧方明如淳注引覲禮爲證竹書紀年大甲十年大
饗于大廟初祀方明然則方明者殷禮已有之敖氏
繼公曰大宗伯職曰以玉作六器以禮天地四方謂
方明之玉也其或然歟

凡天子於諸侯則傳擯諸侯於聘賓則旅擯

廷堪案覲禮嗇夫承命告于天子注嗇夫蓋司空之
屬也爲未擯承命於侯氏下介傳而上上擯以告天
子天子見公擯者五人見侯伯擯者四人見子男擯

者三人皆宗伯爲上擯又會同之禮四傳擯聘禮擯者出請事注天子諸侯朝覲乃命介紹傳命耳其儀各鄉本受命反面傳而下及未則鄉受之反面傳而上又受命傳而下亦如之是天子於諸侯則傳擯也周禮司儀交擯鄭注交擯者各陳九介使傳辭也卽此傳擯也聘禮卿爲上擯大夫爲承擯士爲紹擯擯者出請事注擯謂主國之君所使出接賓者也紹繼也其位相承繼而出也主君公也則擯者五人侯伯也則擯者四人子男也則擯者三人聘義曰介紹而傳命君子於其所尊不敢質敬之至也旣知其所爲

來之事復請之者。賓來當與主君爲禮。爲其謙不敢
斥尊者。啟發以進之。於是時賓出次。直闌西北面上。
擯在闌東闕外西面。其相去也。公之使者七十步。侯
伯之使者五十步。子男之使者三十步。此旅擯耳。不
傳命。上介在賓西北東面。承擯在上。擯東南西面。各
自次序而下。末介末擯。旁相去三丈六尺。上擯之請
事。進南面。揖賓俱前。賓至末介。上擯至末擯。亦相去
三丈六尺。止揖而請事。還入告于公。此三丈六尺者。
門容二徹。參个旁加各一步也。是諸侯於聘。賓則旅
擯也。周禮司儀旅擯。鄭注旅讀爲鴻臚之臚。臚陳之。

也皆陳擯位不傳辭也卽此旅擯也

又案敖氏繼公曰此但言上擯承擯紹擯而不言其
人數則是諸侯之擯者三人而已不以已爵及朝聘
者之尊卑而異所以別於天子也說與注異注據周
禮大行人敖氏但卽經文釋之竊謂諸侯之於聘賓
不應上同天子敖說似亦可從聘禮賓問卿下大夫
擯是卿之擯者一人大行人職曰凡諸侯之卿其禮
各下其君二等卿擯一人則主君擯宜三人矣又大
宗伯三命受位鄭注此列國之卿擯用命數之半卿
三命則擯者當二人而經云一人者則侯國之禮殺

于見天子也。

凡相大禮皆上擯之事。

廷堪案聘禮賓及廟門几筵既設擯者出請命注上
擯待而出請受賓所以來之命重停賓也又云擯者
入告出辭玉注擯者上擯也覲禮侯氏入門右坐奠
圭再拜稽首擯者謁注謁猶告也上擯告以天子前
辭欲親受之如賓客也又聘禮擯者出請事敖氏繼
公曰擯者上擯也云請事則爲上擯可知故不必質
言之而但云擯者也下文放此是相大禮皆上擯之
事也聘禮授玉畢擯者出請寘褥奉束帛加璧享擯

者入告出許又享畢擯者出請事賓告事畢賓奉束
錦以請覲擯者入告出辭請禮賓賓禮辭聽命擯者
入告又公授几擯者告又公拜送醴賓升筵擯者退
負東塾又公用束帛擯者進相幣又賓覲請以臣禮
見擯者辭賓出擯者坐取幣出又擯者請受又授幣
賓降拜君降一等辭擯者曰寡君從子雖將拜起也
又賓覲畢上介士介請覲擯者入告出許上介請以
臣禮見擯者辭介逆出擯者執上幣出請受注此請受請受
于上又擯者請受又上介覲畢擯者又納士介士介
請以臣禮見擯者辭介逆出擯者執上幣以出禮請

受賓固辭公答再拜。擯者立于門中以相拜。又受幣。擯者進。又士介覲畢。擯者出請。賓告事畢。擯者入告。公出送賓。覲禮受玉。侯氏降階再拜稽首。擯者延之。曰：升。又侯氏享。擯者曰：予一人將受之。又事畢告聽事。擯者謁諸天子。又王勞之。再拜稽首。擯者延之曰：升。皆上擯之事。注不云上擯者可知也。又聘禮問卿。擯者出請事。以及請命。反幣。執上幣。相拜之屬。皆下大夫一人。擯無承紹也。又聘禮記。既覲。賓若私獻。奉獻將命。擯者入告。此禮與士介覲略同。則此擯者亦上擯也。又聘禮。賓出。公再拜送。賓不顧。注君命上擯。

送賓出反告賓不顧於此君可以反路寢矣論語說孔子之行曰君召使擯色勃如也足躩如也賓退必復命曰賓不顧矣然則孔子是時蓋以大夫攝卿爲上擯也

又案聘禮授玉公升二等賓升西楹西東面賓者退中庭賓致命公左還北鄉擯者進注進阼階西釋辭於賓相公拜也又云公當楣再拜賓三退負序公側襲受玉于中堂與東楹之間擯者退負東塾而立注反其等位無事江氏永謂此擯者進卽論語趨進之進又引左傳成三年齊侯朝于晉將授玉卻克趨進

襄七年衛孫文子來聘公登亦登叔孫穆子相趨進
九年同盟于戲晉士莊子爲載書鄭公子駢趨進昭
十二年晉侯以齊侯宴投壺公孫使趨進定八年晉
師盟衛侯于鄆澤將畝王孫賈趨進凡五事爲證論
語趨進何氏集解邢疏及集註皆不言在何時江氏
據禮經左氏以釋之其義精矣

凡諸侯使人于諸侯謂之聘使人于大夫謂之問小聘
亦謂之問

廷堪案聘禮記久無事則聘焉注事謂盟會之屬是
諸侯使人于諸侯謂之聘也聘禮賓朝服問卿是諸

侯使人于大夫謂之問也。又小聘曰問。不享有獻。不及夫人。主人不筮。几不禮。面不升。不郊。勞其禮如爲介。三介是小聘。亦謂之問也。周禮大宗伯時聘曰問。大行人時聘以結諸侯之好。問問以諭諸侯之志。又凡諸侯之邦交。歲相問也。殷相聘也。此問皆指小聘。大聘使卿。小聘使大夫也。聘禮記問諸侯。朱綠纁八寸。問大夫之幣。俟于郊。則又問諸侯。問大夫皆謂之問。又論語鄉黨。問人於他邦。然則大夫使人於他邦亦謂之問也。

又案聘禮記下階發氣怡焉。再三舉足。又趨。注孔子

之升堂鞠躬如也屏氣似不息者出降一等遲顏色
怡怡如也沒階趨進翼如也吾友劉訓導台拱據此
以論語入公門一節及下執圭一節皆言聘禮邢叔
明以爲孔子趨朝之禮者非也其說精核不可易徵
引甚富詳見劉君所著書中

又案論語沒階趨進翼如也陸德明釋文無進字云
一本作沒階趨進誤也考聘禮記注所引論語亦作
沒階趨進則鄭氏所見本已有進字非誤明矣陸氏
說不可從

又案聘禮若有私喪則哭于館衰而居不饗食注私

喪謂其父母哭于館衰而居不敢以私喪自聞于主
國凶服于君之吉使春秋傳曰大夫以君命出聞喪
徐行而不反經又云歸使衆介先衰而從之注已有
齊斬之服不忍顯然趨於往來其在道路使介居前
歸又請反命已猶徐行隨之君納之乃朝服既反命
出公門釋服哭而歸經所云乃聘賓出使之後遭父
母之喪之禮非既有父母之喪國君命之出聘也注
引春秋傳見公羊宣八年傳文何氏注聞喪者聞父
母之喪徐行者不忍疾行又爲君當使人追代之亦
指出使之後聞喪而言也檀弓曰父母之喪哭無時

使必知其反也卽本聘禮此經立說鄭氏注禮記偶未引聘禮證之後人遂有據檀弓爲奪情解者嗟乎讀傳記而不讀經其弊乃至於此

凡聘問覲皆于廟會同于壇土相見于寢

廷堪案聘禮聘賓至于朝主人曰不忝先君之祧旣拚以俟矣注遷主所在曰祧周禮天子七廟文武爲祧諸侯五廟則祧始祖也是亦廟也言祧者祧尊而廟親待賓客者上尊者又聘時及廟門公揖入立于中庭賓立接西塾几筵旣設擯者出請命注有几筵者以其廟受宜依神也賓至廟門司宮乃于依前設

之聘禮重故主國之君受之于始祖廟也又云賓朝服問卿卿受于祖廟注重賓禮也祖王父也問卿聘賓奉其君命來其禮亦重故主國之卿受之于祖廟也雖廟受而不几筵辟君也覲禮諸侯前朝皆受舍于朝同姓西面北上異姓東面北上注受舍于朝次于文王廟門之外疏云諸侯待朝聘之賓皆在太祖之廟以其遷主所藏皆在始祖之廟故以始祖爲祧天子待覲遇亦當在祧祭法云天子七廟有二祧又周禮守祧職云掌守先王先公之廟祧穆之遷主藏于文王廟昭之遷主藏于武王廟今不在武王廟

而在文王廟者，父尊而子卑，故知在文王廟也。覲禮
又云：覲畢，乃右肉袒于廟門之東。曲禮曰：天子當依
而立，諸侯北面而見天子曰覲。天子當寧而立，諸公
東面，諸侯西面曰朝。鄭氏注：諸侯春見曰朝，受摯於
朝，受享於廟，生氣文也。秋見曰覲，一受之於廟。謂受
摯也。殺氣質也。朝者位於內朝，而序進覲者位於
廟門外，而序入王南面，立於依寧而受焉。夏宗依春
冬遇，依秋周官大行人上公諸侯諸伯諸子諸男皆
廟中將幣三享，亦指朝覲宗遇而言。所謂廟者皆祧
廟也。覲者諸侯見于天子之禮，較之聘問為尤重。故

天子受之於文王廟也是聘問覲皆受之於廟也覲禮諸侯覲於天子爲官方三百步四門壇十有二尋深四尺注四時朝覲受之於廟此謂時會殷同也宮謂壇土爲埽以象牆壁也爲宮者於國外春會同則於東方夏會同則於南方秋會同則於西方冬會同則於北方八尺曰尋十有二尋則方九十六尺也深謂高也從上曰深司儀職曰爲壇三成成猶重也三重者自下差之爲三等而上有堂焉堂上方二丈四尺上等中等下等每面十二尺王巡守至于方嶽之下諸侯會之亦爲此宮以見之司儀職曰將會諸侯

則命爲壇三成宮旁一門詔王儀南鄉見諸侯也是
會同則於壇也至於士相見禮非問卿可比其禮殺
行禮之處經無明文考士昏記若不親迎壻見注壻
見于寢壻見之禮略如士相見之禮則士相見當亦
于寢矣

又案覲禮受舍于朝而注以爲文王廟門之外者考
周官小宗伯掌建國之神位左宗廟鄭氏注庫門內
雉門外之左右又小司寇掌外朝之政鄭氏注外朝
者朝在雉門之外者也朝土注謂在庫門之外與此異廟在雉門之
外外朝亦在雉門之外則朝卽文王廟門之外矣其

位卽經所云同姓西面北上異姓東面北上是也李氏心傳知朝爲外朝而不知注所謂文王廟門之外卽外朝也竊謂將覲之時或先行諸侯常朝之禮故經云諸侯前朝而有西面東面之位注謂此覲也言朝者覲遇之禮雖簡其來之心猶若朝也恐非非春朝之朝也萬氏斯大曰先朝後覲原非二禮以此說覲禮似也然以周禮春朝夏宗冬遇皆不足信則太近武斷又張氏爾岐曰受享于廟者路門外之朝天子當展而立者也此說尤非享有升階降階之儀而展則設于戶牖之間路門外之朝無堂安得有階與戶牖乎鄭氏以朝爲廟門之

其說尚可通張氏以廟中爲路門外之朝則不知其何所據也

覲義

古者天子以賓禮親邦國春見曰朝夏見曰宗秋見曰覲冬見曰遇時見曰會殷見曰同是故天子當依而立諸侯北面而覲天子當宁而立諸公東面諸侯西面而朝凡朝覲宗遇會同于王公執桓圭侯執信圭伯執躬圭繅皆三采三就子執穀璧男執蒲璧繅皆二采再就廟中將幣皆三享諸侯朝于天子曰述職一不朝則貶其餘再不朝則削其地三不朝則六師移之故曰朝覲

之禮所以明君臣之義也朝者位于內朝而序進受贊于朝受享于廟生氣文也覲者位于廟門外而序入受摯受享皆于廟殺氣質也覲禮至于郊王使人皮弁用璧勞優侯氏也天子賜舍使侯氏卽安也天子衮冕負斧依鄉明出治象天道也侯氏裨冕入門右所以承天象地道也覲用命圭特達禮以少爲貴也享用束帛加璧有庭實隆殺之義也奠圭于堂下擯者辭然後升致命降階再拜稽首送玉擯者辭然後升成拜覲禮盛侯氏先以臣禮見天子以客禮受之也三享皆中庭奠幣升堂致命降階再拜稽首不復升成拜者享禮殺至乎

爲臣也。享畢不禮。賡天子尊也。不饗侯氏自來非使人也。禮畢乃右肉袒于廟門之東。天子威諸侯也。賜侯氏以車服。天子懷諸侯也。或曰奠圭降拜升成拜。明臣禮也。肉袒入門而右。以聽事也。饗禮乃歸賓客之道也。時會殷同之禮。諸侯覲于天子。爲宮方三百步。四門。壇十有二尋。深四尺。加方明于其上。古者諸侯不順服。王將有征討之事。則旣朝覲。王爲壇於國外。合諸侯而命事焉。謂之時會。十二歲。王如不巡守。則六服盡朝。朝禮旣畢。王亦爲壇。合諸侯以命政焉。所命之政。如王巡守。謂之殷同。方明設六色六玉者。禮天地四方也。覲受之于

願會同受之于壇文質相變也上公建常九旂侯伯建常七旂子男建常五旂故曰公侯伯子男皆就其旂而立也拜日於東門之外日生于東也禮山川邛陵於西門外山川導自西也禮日於南門外就陽位也禮月與四瀆於北門外就陰位也祭天燔柴祭山邛陵升本乎天者親上也祭川沈祭地瘞本乎地者親下也天子將行會同之禮必先朝覲諸侯于廟故孔子曰宗廟會同非諸侯而何爲其相者諸侯之卿大夫士也故曰宗廟之事如會同端章甫願爲小相焉朝覲宗週常禮也會同大禮也朝覲宗週之於會同如祠禴嘗烝之於禘祫

也先王之制邦內甸服邦外侯服侯衛賓服蠻夷要服
戎翟荒服甸服者祭侯服者祀賓服者享要服者貢荒
服者王日祭月祀時享歲貢終王先王之訓也大雅曰
韓侯入覲以其介圭入覲于王言覲禮也又曰王錫韓
侯淑旂綬章簟第錯衡元袞赤舄鈎膺鏤錫鞞鞞淺屨
倬革金厄言旣覲而賜之車服也小雅曰赤芾金舄會
同有繹言會同之禮也